

Company Name : Pharmaniaga Berhad
Date : 17 May 2017
Source : Utusan Malaysia

Pharmaniaga catat keuntungan selepas cukai RM19 juta

Oleh NABILA YASMIN RAZIB
ekonomi@utusan.com.my

KUALA LUMPUR 16 Mei - Pharmaniaga Bhd. mencatatkan keuntungan selepas cukai berjumlah RM19 juta bagi suku pertama berakhir 31 Mac 2017 berbanding RM18 juta bagi suku sama tahun lalu.

Pengerusi Pharmaniaga, Tan Sri Lodin Wok Kamaruddin (**gambar**) berkata, untung sebelum cukai serta perolehan syarikat turut

meningkat masing-masing kepada RM28 juta dan RM618 juta.

Katanya, bahagian logistik dan pengedaran mencatatkan untung sebelum cukai lebih tinggi berjumlah RM2.2 juta bagi suku tahun berbanding RM0.9 juta

pada suku sama tahun sebelumnya disumbangkan oleh perniagaan konsesi dan sektor swasta.



Beliau berkata, bahagian pengilangan bagaimanapun mencatatkan untung sebelum cukai lebih rendah iaitu sebanyak RM26 juta berbanding RM27 juta yang dicatatkan pada suku yang sama tahun lepas.

"Kami gembira untuk memulakan tahun dengan prestasi kukuh, dipacu oleh permintaan lebih tinggi daripada

hospital Kerajaan dan juga perniagaan sektor swasta, selain disokong oleh sumbangan lebih besar daripada operasi luar negara.

"Dalam pada itu, kami yakin dapat mengekalkan momentum sambil kami berusaha memanfaatkan pelbagai peluang di pasaran tempatan dan antara-bangsa dengan Indonesia kekal sebagai satu daripada bidang pertumbuhan utama, selain akan turut meluaskan kehadiran global

terutamanya di Eropah," katanya dalam kenyataan di sini hari ini.

Tambahnya, Pharmaniaga juga akan terus memberi tumpuan melaksanakan langkah mengoptimalkan kos secara berterusan di seluruh operasinya bagi mengukuhkan potensi pendapatan dan mengekalkan prestasi pada masa hadapan.

Beliau berkata, bahagian Indonesia mencatatkan peningkatan memberangsangkan bagi untung sebelum cukai sebanyak RM0.9

juta berbanding kerugian RM1.0 juta pada suku yang sama tahun lepas.

"Ini disebabkan terutamanya oleh sumbangan lebih tinggi hasil peningkatan kecekapan operasi dan kos kewangan yang lebih rendah," jelasnya.

Pharmaniaga turut mengisytiharkan dividen interim 4 sen sesaham yang akan dibayar pada 7 Jun 2017 kepada pemegang saham yang tersenarai dalam daftar pada 31 Mei 2017.